

ւոր է, թէ նոյն ժամանակաշրջաններում ինչ պատկեր էին ներկայացնում Հայաստանի՛ն վերաբերեալ թուական տուեալները:

Խօսքը, ի հարկէ, միշտ էլ Անդրկովկասեան Հայաստանի մասին է: Եւ սակայն, եթէ վիճակադրական տեղեկութիւնների ամփոփումը Անդրկովկասի հայութեան վերաբերեալ ինքնին բաւականաչափ դժուարութիւններ է ներկայացնում, նոյն այդ աշխատանքը Հայաստանի հողային տարածութեան (տերրիտորիա) եւ նրա ազգարնակչութեան մասին՝ հանդիպում է գրեթէ անյաղթահարելի խոչընդոտներին: Եւ այդ ո՛չ միայն նրա համար, որ ուսասական հարիւրամեայ տիրապետութեան ընթացքում Անդրկովկասը բազմիցս ենթարկւել է վարչական նորանոր բաժանումներին, ո՛չ միայն նրա համար, որ նոյն այդ ժամանակաշրջանում Անդրկովկասի քաղաքական սահմանները մերթ լայնացել են եւ մերթ էլ սեղմուել, որպէսզի հաշիւներ անելով կարելի լինէր մօտաւորապէս ճշդել զանազան թուականների տուեալները, այլ եւ մանաւանդ նրա՛ համար, որ ուսական իշխանութիւնները գրեթէ երբեք էլ չեն ճանաչել եւ ընդունել ազգային հոգաւմասեր (տերրիտորիաներ) Անդրկովկասում, որով եւ, ընականաբար, չէին կարող մտածել այն մասին, որ վիճակադրական տեղեկութիւններ հաւաքէին նաեւ համաձայն ազգային տերրիտորիաների:

Երբ 1801-ին Վրաստանը միացուեց ուսական կայսրութեան, երբ այնուհետեւ, 10-15 տարի յետոյ, արեւելեան Անդրկովկասը եւ Ղարաբաղը, 1828-1829-ին էլ Երեւանի ու Նախիջևանի խանութիւնները (այդ ամէնը՝ Պարսկաստանից դրաւուելով), յետոյ նաեւ Ծիրակի, Ախալցխայի ու Ախալքալաքի շրջանները (Տաճկաստանից), աւելի ուշ էլ, 1878ին, Կարսի եւ Բաթումի նահանգները (դարձեալ Տաճկաստանից) դրաւուեցին ու միացուեցին ուսական կայսրութեան (Անդրկովկաս), ցարական իշխանաւորներից ոչ ոքի մտքով իսկ չանցաւ, թէ յարգել պէտք է այդտեղ ապրող ազգութիւնների եւ ամենից առաջ՝ հայերի, վրացիների ու թաթարների պատմական իրաւունքները, թէ՛ դրանք աւելի կամ պակաս խտութեամբ նստած են իրենց պատմական,

հայրենի տերրիտորիաների վրայ, թէ՛ ուրեմն, պէտք է որպէս այդպիսին էլ նկատի առնուին:

Միմիայն կարճ ժամանակով (մինչեւ 1840 թ.) այն եւս քաղաքական եւսական նպատակներով, ուսմանը հայերի անունով «Հայկական Երջան» կոչեցին մեր անդրկովկասեան հողերի այն մասը, որ տիրեցին նրանք 1828ին, թուրքմանչայի դաշնագրի գորութեամբ: Վրաստանը, որ մինչ այն գոյութիւն ունէր — թող լինէր նա շատ թոյլ եւ գրեթէ անուանական — որպէս անկախ թագաւորութիւն, աւելի չուտ՝ թագաւորութիւններ եւ իշխանապետութիւններ (Քարթլինա կամ բուն Վրաստան, Իմերէթիա, Կախէթիա եւ այլն), վերացաւ մէջ տեղից ո՛չ միայն քաղաքականապէս, այլ եւ անուանապէս:

Մի որոշ ժամանակ միայն, որպէս վարչական միաւոր, պահպանուեց վրացիների համար — ինչպէս մեզ համար «Հայկական Երջան» էր — սկզբում «Վրաստանի Նահանգ», յետոյ էլ Վրա-Իմերէթեան Նահանգ» անունը: Իրանց մէջ մտնում էին նաեւ այնպիսի հայկական գաւառներ, ինչպիսիք էին եւ են՝ Լոռին, Փամբակը, Իջևանը, Զաւախքը (Ախալքալաք), անգամ Ծիրակը: Նոյն այդ անուանակոչման ուշ մնացած արձագանգն էր նաեւ, հայ-եկեղեցական բաժանումով, «Վրաստանի եւ Իմերէթի թեմը», Թիֆլիս կենտրոնով:

Իսկ ինչ վերաբերում է արեւելեան Անդրկովկասին կամ թուրք-թաթարական տերրիտորիային, նա երբեք էլ, մինչեւ վերջը եւ մինչեւ նորաստեղծ, արուեստական «Ադրբէջան» անուան հրասպարակ գալը, թէկուզ կարճ ժամանակով իսկ՝ ազգային-տերրիտորիալ կոչում չունեցաւ: Սկզբում Բաղուի, Գանձակի եւ այլն խանութիւններ էին այդտեղ, յետոյ դարձան «Կասպիական Երջան», մինչեւ որ վերջը, Անդրկովկասի միւս շրջանների հետ միասին, վարչական նոր բաժանումների ենթարկուեցին, վերածուելով զանազան նահանգների եւ գաւառների:

Վարչական — վիճակադրական տեսակէտից մինչեւ իսկ Անդրկովկասը որպէս այդպիսին ամբողջութեամբ պահուած ջմնաց, այլ միացաւ Հիւսիսային Կովկասի հետ եւ երկուսով դարձան՝ Կովկաս: